

Bosna i Hercegovina  
Federacija Bosne i Hercegovine  
SREDNJOBOSANSKI KANTON/KANTON SREDIŠNJA BOSNA  
KANTONALNI SUD U NOVOM TRAVNIKU  
Broj: 06 0 K 010529 17 K  
Novi Travnik, 25.04.2018. godine

## U IME FEDERACIJE BOSNE I HERCEGOVINE!

Kantonalni sud u Novom Travniku, u vijeću sastavljenom od sudaca Darmina Avdić kao predsjednika vijeća, te Suade Kahrić i Davora Kelava kao članova vijeća, uz sudjelovanje Sanele Nesimi kao zapisničara, u krivičnom predmetu protiv optuženih Sabahudina Habib zbog krivičnih djela ubistva iz člana 166. stav 1. i 2. tačka d) u sticaju sa krivičnim djelom nedozvoljeno držanje oružja ili eksplozivnih materija iz člana 371. stav 1. Krivičnog zakona Federacije Bosne i Hercegovine i Arnela Habib, Sanela Habib i Avde Habib zbog krivičnog djela sprečavanje službene osobe u vršenju službene radnje iz člana 358. stav 1. u vezi sa članom 31. istog zakona, postupajući po izmijenjenoj optužnici Kantonalnog tužilaštva Travnik broj: T06 0 KT 0020199 17 od 05.04.2018. godine, nakon održanog glavnog pretresa u prisustvu optuženih, branitelja optuženog Sabahudina Habib advokata Bekira Ferizović iz Travnika i branitelja optuženog Arnela Habib advokata Seada Agić iz Travnika i kantonalnog tužitelja Šaćira Hadžić, po obavljenom vijećanju i glasanju donio je i dana 25.04.2018. godine, u prisustvu stranaka, oštećenih i branitelja optuženog Arnela Habib, a u odsustvu uredno obaviještenog branitelja optuženog Sabahudina Habib, javno objavio slijedeću:

## PRESUDU

I

Optuženi:

1. SABAHUDIN HABIB zv. „Budo“ sin Avde i majke Hamše djevojački Dogan, rođen 15.05.1969. godine u mjestu Sokolina općina Donji Vakuf [REDACTED], Bošnjak, državljanin BiH, JMB: [REDACTED], nalazi se u pritvoru od 21.03.2017. godine, sa ostalim podacima kao u spisu,
2. ARNEL HABIB sin Sabahudina i majke Fahrije djevojački Draginović, rođen 16.03.1995. godine u Bugojnu, nastanjen u [REDACTED], Bošnjak, državljanin BiH, JMB: [REDACTED], nalazio se u pritvoru od 21.03.2017. godine do 11.04.2017. godine, sa ostalim podacima kao u spisu,
3. SANEL HABIB sin Avde i majke Hamše djevojački Dogan, rođen 14.02.1979. godine u mjestu Sokolina općina Donji Vakuf [REDACTED], Bošnjak, državljanin BiH, JMB: [REDACTED], nalazi se na slobodi, sa ostalim podacima kao u spisu,

4. AVDO HABIB sin Hasana i majke Ramize djevojački Mehtić, rođen 10.05.1942. godine u mjestu Sokolina općina Donji Vakuf [REDACTED], Bošnjak, državljanin BiH, JMB: [REDACTED], sa ostalim podacima kao u spisu,

## KRIVI SU

Što su:

Optuženi Sabahudin Habib sam:

Dana 21.03.2017. godine u poslijepodnevnom satima u mjestu Sokolina općina Donji Vakuf usmratio tri osobe na način da je, nakon što je doznao da su došli predstavnici šumarije sa namjerom da odvezu ranije bespravno posječenu drvenu masu, dovezao se svojim traktorom gdje su se već nalazili čuvari šuma Omer Bašić i Ferid Rahmanović i angažovani radnici Ševko Draginović, Mubekir Selimović i Ilfan Kovač, kao i njegov otac Avdo Habib, brat Sanel Habib i rođak Sabit Habib, a potom se obratio Ševki Draginović riječima: „Da li ti misliš ići po one trupce gore, nećeš moći proći, past će mrtva glava“ na šta je Ševko Draginović odgovorio da će ići, nakon čega je Sabahudin Habib otišao do šupe Sabita Habib iz koje je uzeo pušku i stavio je na traktor, a potom se vratio do lokalnog puta i traktorom zapriječio put kojim je namjeravao proći Ševko Draginović, da bi se potom do tog mjesta dovezao Ševko Draginović traktorom, a sa njim je došao i Omer Bašić, te im je Sabahudin Habib prišao držeći pušku u ruci i nastavio da se prepire sa Ševkom Draginović, koji je u tom trenutku pokušao da to sve snimi mobilnim telefonom u čemu ga je sprečavao u međuvremenu pridošli Arnel Habib, sin Sabahudina Habib, koji se obratio ocu riječima: „Vidiš da te snima, otmi mu telefon“ nakon čega je Ševko Draginović mobitel dodao Omeru Bašić na kojeg su odmah fizički nasrnuli Avdo Habib, Arnel Habib, Sabit Habib i Sanel Habib, dok je Sabahudin Habib, u namjeri da usmrti oštećenog Omera Bašić, repetirao automatsku pušku tipa Kalašnjikov, rumunske proizvodnje, model „AIM“, kalibra 7,62x39 mm, serijskog broja ACZ 3097, te sa udaljenosti od oko 1,5 metara ispalio tri metka u njegovom pravcu, svjestan da ga na takav način može lišiti života i htijući to, od kojih su sva tri metka pogodila oštećenog u predjelu leđa sa ulaznim otvorima u donjim partijama leđa uslijed čega je nastupila smrt oštećenog Omera Bašić kao posljedica razaranja srca, potpomognutog obimnim izlivom krvi u obje grudne duplje, a potom se okrenuo prema oštećenom Ševki Draginović, koji se nalazio za upravljačem traktora marke „Univerzal“ crvene boje, te sa udaljenosti od oko 1,5 metara iz iste automatske puške ispalio više metaka u njegovom pravcu, svjestan da ga na takav način može lišiti života i htijući to, pa je sa tri metka pogodio oštećenog Ševku Draginović u predjelu leđa sa ulaznim otvorima straga lijevo uslijed čega je kod istog nastupila smrt kao posljedica razaranja srca, nakon čega je tražio oštećenog Ferida Rahmanović govoreći: „Gdje je Ferid, majku mu“, te kad ga je spazio kako stoji na lokalnom putu pored vozila „Niva“, sa udaljenosti preko 1,5 metara iz iste automatske puške ispalio više metaka u njegovom pravcu, svjestan da ga na taj način može lišiti života i htijući to, od kojih ga je sa dva metka pogodio u predjelu nogu uslijed čega je oštećeni Ferid Rahmanović pao na tlo, dok je Sabahudin Habib dotrčao do njega i sa udaljenosti ispod 1,5 metara sa tri metka pogodio ga u predjelu leđa, uslijed čega je nastupila smrt oštećenog Ferida Rahmanović kao posljedica jakog i naglog izliva krvi u lijevu grudnu i trbušnu duplju.

Optuženi Arnel Habib, Sanel Habib i Avdo Habib zajedno:

Dana 21.03.2017. godine u poslijepodnevnim satima u mjestu Sokolina, općina Donji Vakuf, silom spriječili službenu osobu u vršenju službene radnje na način da su, skupa sa Sabahudinom Habib i Sabitom Habib, spriječili čuvara šuma Omera Bašić u obavljanju službenih radnji, tako što su zajedno došli na lokalni put i traktorom zapriječili prolazak Ševki Draginović, koji je za potrebe Šumarije Donji Vakuf obavljao prijevoz zaplijenjene drvene mase, te izravno upotrijebili silu prema čuvaru šuma Omeru Bašić koji je mobitelom pokušao snimiti događaj tako što su ga fizički napali sa namjerom da ga onemoguće u tome.

Čime su počinili i to optuženi Sabahudin Habib u sticaju tri krivična djela ubistva iz člana 166. stav 1. Krivičnog zakona Federacije BiH, a optuženi Arnel Habib, Sanel Habib i Avdo Habib krivično djelo sprečavanje službene osobe u vršenju službene radnje iz člana 358. stav 1. u vezi sa članom 31. Krivičnog zakona Federacije BiH,

pa sud, primjenom odredbe člana 54. stav 1. istog zakona, optuženom Sabahudinu Habib za svako od tri krivična djela ubistva iz člana 166. stav 1. Krivičnog zakona Federacije BiH utvrđuje kazne zatvora u trajanju od po 12 (dvanaest) godina, te uz dalju primjenu istih zakonskih odredbi i člana 54. stav 2. tačka c) Krivičnog zakona Federacije BiH,

Optuženog Sabahudina Habib

OSUĐUJE NA JEDINSTVENU KAZNU DUGOTRAJNOG ZATVORA U TRAJANJU  
OD 34 (tridesetčetiri) GODINE

Optuženog Arnela Habib

OSUĐUJE NA KAZNU ZATVORA U TRAJANJU OD  
1 (jedne) GODINE I 6 (šest) MJESECI

Optuženog Avdu Habib

OSUĐUJE NA KAZNU ZATVORA U TRAJANJU OD 2 (dvije) GODINE

Primjenom odredbe člana 62. stav 1., stav 2. i stav 3. Krivičnog zakona Federacije BiH, optuženom Sanelu Habib se izriče

UVJETNA OSUDA

kojom se optuženom utvrđuje kazna zatvora u trajanju od 1 (jedne) godine i istovremeno određuje da se ta kazna neće izvršiti ako optuženi u roku od 2 (dvije) godine ne počini novo krivično djelo počev od dana pravosnažnosti presude.

Na osnovu člana 57. stav 1. Krivičnog zakona Federacije BiH optuženom Sabahudinu Habib u izrečenu kaznu ima se uračunati vrijeme koje je proveo u pritvoru počev od 21.03.2017. godine pa do upućivanja na izdržavanje kazne, a optuženom Arnelu Habib se u izrečenu kaznu ima uračunati vrijeme koje je proveo u pritvoru u periodu od 21.03.2017. godine do 11.04.2017. godine.

Na osnovu člana 78. stav 1. Krivičnog zakona Federacije BiH od optuženog Sabahudina Habib trajno se oduzima automatska puška tipa Kalašnjikov, rumunske proizvodnje, model „AIM“, kalibra 7,62x39 mm, serijskog broja ACZ 3097, godina proizvodnje 1989., te se istovremeno određuje da se ista puška ima uništiti po pravosnažnosti presude.

Na osnovu člana 202. stav 1. Zakona o krivičnom postupku Federacije BiH optuženi se obavezuju da solidarno naknade zajedničke troškove krivičnog postupka, a optuženi Sabahudin Habib i Arnel Habib i troškove njihove odbrane po postavljenim braniteljima, o čemu će sud donijeti posebno rješenje, te da svaki od optuženih na ime paušala plati iznos od po 100,00 (stotinu) KM.

Na osnovu člana 212. stav 3. Zakona o krivičnom postupku Federacije BiH oštećenima se u cijelosti dosuđuje imovinskopravni zahtjev tako da se optuženi Sabahudin Habib obavezuje da na ime nematerijalne štete odnosno duševne boli zbog smrti bliskog srodnika svakom od oštećenih i to supruzi oštećenog Omera Bašić Sabi Hodžić, djeci oštećenog Omera Bašić Mevli Bašić, malodobnom Aliji Bašić, malodobnoj Merdiji Bašić, malodobnoj Zehri Bašić, Esmi Bašić, Harisu Bašić i Fatimi Freljević djevojački Bašić, zatim supruzi oštećenog Ferida Rahmanović Nermini Rahmanović, djeci oštećenog Ferida Rahmanović Almi Rahmanović, Dženani Rahmanović i Elmi Malkić djevojački Rahmanović, te ocu oštećenog Ferida Rahmanović Izetu Rahmanović, kao i supruzi oštećenog Ševke Draginović Nermini Draginović, djeci oštećenog Ševke Draginović Benjaminu Draginović, Amni Draginović, Mejrimi Huber djevojački Draginović i Mujesiri Krhan djevojački Draginović, te ocu oštećenog Ševke Draginović Hasanu Draginović, isplati novčanu naknadu u iznosu od po 20.000,00 (dvadesethiljada) KM.

## II

Na osnovu člana 299. tačka c) Zakona o krivičnom postupku Federacije BiH optuženi Sabahudin Habib, sa ostalim podacima kao u spisu

### OSLOBADA SE OD OPTUŽBE

Da je:

U tačno neutvrđeno vrijeme, protivno odredbama člana 7. i člana 8. Zakona o nabavljanju, držanju i nošenju oružja i municije („Sl. novine SBK/KSB“ broj: 12/14), nabavio, a zatim u šupi njegovog rođaka Sabita Habib u mjestu Sokolina općina Donji Vakuf sve do 21.03.2017. godine, držao vatreno oružje automatsku pušku tipa

Kalašnjikov, rumunske proizvodnje, model „AIM“, kalibra 7,62x39 mm, serijskog broja ACZ 3097, godina proizvodnje 1989., iako je znao da nabavka i držanje takvog oružja građanima nije dozvoljena,

čime da je počinio krivično djelo nedozvoljeno držanje oružja ili eksplozivnih materija iz člana 371. stav 1. Krivičnog zakona Federacije BiH.

Na osnovu člana 203. stav 1. Zakona o krivičnom postupku Federacije BiH troškovi krivičnog postupka koji se odnose na navedeno krivično djelo, padaju na teret budžetskih sredstava.

Nakon toga sud donosi

### Rješenje

Temeljem odredbe člana 152. stav 1. i stav 3. Zakona o krivičnom postupku Federacije BiH protiv optuženog Sabahudina Habib produžava se pritvor koji po ovom rješenju može trajati najduže 9 mjeseci o čemu će sud izraditi posebnu odluku.

Zapisničar  
Sanela Nesimi

Predsjednik vijeća  
Darmin Avdić